



BOSNA I HERCEGOVINA
PARLAMENTARNA SKUPŠTINA
PREDSTAVNIČKI DOM
ADMINISTRATIVNA KOMISIJA
Broj: 01/7-011-264/03
Sarajevo, 26.02.2003. godine

ZAPISNIK

četvrte sjednice Administrativne komisije Predstavničkog doma Parlamentarne skupštine BiH, koja je održana 25.02.2003.godine, u trajanju od 11,00 do 13,30 sati, u zgradi institucija BiH.

Sjednicom je predsjedavao prvi zamjenik predsjedavajućeg Komisije Vinko Zorić.

Sjednici su, osim prvog zamjenika predsjedavajućeg, prisustvovali članovi Komisije: Šefik Džaferović, Mirko Blagojević, Hazim Felić, Momčilo Novaković i Jozo Križanović.

Sjednici Komisije opravdano nisu prisustvovali: Niko Lozančić, koji je razriješen dužnosti, te Izet Žigić, koji je imenovan u Vladu FBiH.

Sjednici su prisustvovali Vedran Hadžović, sekretar Zajedničke službe, Branka Todorović, sekretar Predstavničkog doma, Mirjana Crnjak, šef Opće službe, Jadranka Korać, šef Službe računovodstva, i Dragica Hinić, stručni saradnik u radnim komisijama Parlamentarne skupštine BiH.

Za sjednicu je predložen slijedeći

DNEVNI RED:

1. Usvajanje Zapisnika 3. sjednice Administrativne komisije;
2. Razmatranje preostalih žalbi u kontekstu provođenja Odluke o pravima poslanika i delegata na stalnom radu u Parlamentarnoj skupštini BiH nakon 05.10.2002. godine;
3. Razmatranje novih zahtjeva za profesionaliziranje poslanika;
4. Zahtjev Kluba poslanika BOSS-a, DNZ-a i Narodne stranke- radom za boljitak;
5. Tekuća pitanja.

Dnevni red usvojen je jednoglasno.

Ad.1.

Zapisnik 3.sjednice Administrativne komisije usvojen je jednoglasno.

Ad.2.

Mirjana Crnjak informirala je o preostalim pet slučajeva vezanih za prigovore poslanika prethodnog saziva ovog parlamenta, u kontekstu provođenja Odluke o pravima poslanika i delegata na stalnom radu u Parlamentarnoj skupštini BiH, nakon isteka mandata 05.10.2002. godine. Radi se o Bahriji Osmanović, koja je imala status penzionera prije profesionaliziranja u Parlamentarnoj skupštini BiH, Abdurahmanu Malkiću i Ljubomiru Kovačeviću, koji nisu umirovili radno-pravni odnos u ranijoj firmi, te Branislavu Loliću i Mirku Banjcu, koji su umirovili svoj radno-pravni odnos u ranijoj firmi. Četvorici navedenih poslanika su, saglasno zaključku prethodne sjednice, upućeni zahtjevi za dostavu potvrda o njihovom sadašnjem

radno-pravnom statusu, dok je za Bahriju Osmanović upućen zahtjev Zavodu PIO/MIO Tuzla, kojim je zatraženo tumačenje njenog statusa. U međuvremenu su dostavljene određene potvrde.

U raspravi su učestvovali Šefik Džaferović, Hazim Felić, Vinko Zorić, Jozo Križanović, Momčilo Novaković, Mirko Blagojević i Vedran Hadžović.

Šefik Džaferović ukratko je izložio dosadašnji način rada Komisije i principe kojih se pridržavala. Pri tome je istaknuo da su prigovori ovih lica razvrstani u tri kategorije i to: prigovori penzionera, prigovori poslanika, koji su rješenjem umirovili svoj radno-pravni status s ranijom firmom, i prigovori onih koji to nisu učinili. Ponovo je insistirao na stavu Komisije o potrebi izmjene Odluke o pravima poslanika i delegata na stalnom radu u Parlamentarnoj skupštini BiH, u smislu smanjenja roka za isplatu naknada ovim licima na šest mjeseci, jer je taj rok utvrđen u svim drugim državnim i upravnim organima. S njegovim mišljenjem saglasan je i Jozo Križanović. Ostali učesnici u raspravi mišljenja su da se navedena odluka mora primjenjivati, sve dok se ne izmijeni novom odlukom administrativnih komisija oba doma.

Vinko Zorić smatra nelogičnim da se izmijenjena odluka primjenjuje na ove poslanike, jer im je prestao mandat, s njihovim saznanjem o pravima koja imaju po važećoj odluci.

Većina članova Komisije smatra da bi, eventualnom izmjenom odluke, trebalo udovoljiti zahtjevima svih ovih poslanika, izuzev penzionera s punim penzijskim stažom, s obzirom da se radi o malom broju.

Vedran Hadžović mišljenja je da se ovi problemi i nejasnoće pri rješavanju prigovora poslanika mogu riješiti promjenom Odluke, u smislu da pravo na naknadu mogu imati i oni poslanici koji su umirovili svoj radno-pravni odnos ali se ne mogu vratiti u raniju firmu, osim penzionera s punim penzijskim stažom. Stoga je potrebno održati zajedničku sjednicu administrativnih komisija oba doma kako bi se izmijenila Odluka u navedenom smislu.

Vinko Zorić potom je predložio da se navedeni slučajevi razmatraju redom, svaki zasebno, što je i prihvaćeno.

Po zahtjevima poslanika, članovi Komisije jednoglasno su donijeli slijedeće zaključke:

a) Na ovoj sjednici donose se konkretne odluke vezane za ostvarivanje prava po osnovu neraspoređenosti u slučajevima gdje je priložena dokumentacija nesporna i to za:

1. Abdurahmana Malkića i Ljubomira Kovačevića (nisu imali umirovljen radno-pravni status)
 - Odobren zahtjev za ostvarivanje prava po osnovu neraspoređenosti ;
2. Bahrija Osmanović (imala status penzionera prije profesionalizacije u Parlamentu BiH)
 - Po važećoj odluci, ne bi imala pravo na naknadu po osnovu neraspoređenosti;
3. Branislav Lolić (rješenjem umirovljen radno-pravni status u KBC Banja Luka)
 - Potrebno uputiti zahtjev KBC-u Banja Luka i zatražiti njihovo izjašnjenje da se gospodin Lolić ne može vratiti na radno mjesto koje odgovara njegovoj stručnoj spremi;
4. Mirko Banjac (rješenjem umirovljen radno-pravni status u Prosvjetno-pedagoškom zavodu)
 - Kako iz dostavljenih potvrda nije jasan status imenovanog, tj. da li se on može vratiti u Prosvjetno-pedagoški zavod na radno mjesto s kojeg je došao u Parlamentarnu skupštinu BiH, saglasno njegovoj molbi, sačekati novu potvrdu ove institucije i potom donijeti odluku.

b) Također, jednoglasno je zaključeno da će o dužini korištenja prava poslanika koji su podnijeli zahtjev po osnovu neraspoređenosti biti odlučeno nakon održane zajedničke sjednice administrativnih komisija oba doma.

Komisija će inicirati izmjenu Odluke u smislu da se i ostalim poslanicima koji su podnijeli zahtjev po osnovu neraspoređenosti (poslanici koji su umirovili radno-pravni status bez mogućnosti povratka u firmu, izuzev penzionera s punim penzijskim stažom) omogućiti ostvarenje tog prava. Saglasno ovom zaključku, konačne odluke o zahtjevima za ostvarenje prava Branislava Lolića, Mirka Banjca i Bahrije Osmanović bit će donesene poslije

zajedničke sjednice administrativnih komisija oba doma. Do donošenja konačnih odluka ovim licima neće se isplaćivati naknade.

Administrativno-finansijskoj komisiji Doma naroda predložit će se održavanje zajedničke sjednice u petak, 28.02.2003. god., s obzirom na hitnost rješavanja ovih pitanja.

c)U okviru ove tačke razmatrana je i žalba Seade Palavrić zbog neisplaćene naknade po osnovu toplog obroka, naknade za odvojeni život od porodice, naknade za posjetu porodici i za zakup stana, za mjesec decembar 2002. i januar 2003. godine. Također je podnijela i zahtjev za naknadu korištenja mobilnog telefona kao predsjedavajući Kluba.

Vedran Hadžović potom je informirao da je donesena odluka o retroaktivnoj isplati traženih naknada imenovanoj. Zbog neisplaćivanja pomenutih naknada došlo je zato što je odluka relativno kasno donesena. Povodom zahtjeva za naknadu toplog obroka za decembar 2002. godine, Hadžović je rekao da su potrošena budžetska sredstva za prošlu godinu i da se ovaj zahtjev može odobriti jedino u slučaju da Trezor odobri prebacivanje sredstava s jedne budžetske stavke na drugu. Sekretarijat se već obraćao s ovim zahtjevom i očekuje se njihov odgovor. Ovaj postupak mora se ispoštovati radi revizijske kontrole i trezorskog sistema poslovanja.

Istaknuo je također da se njenom zahtjevu za naknadu korištenja mobilnog telefona ne bi moglo udovoljiti, jer je za to potrebno izmijeniti odluku u smislu izjednačavanja prava predsjedavajućih klubova Predstavničkog doma s predsjedavajućim klubova Doma naroda. Ova izmjena odluke moguća je jedino ako je usvoje administrativne komisije oba doma.

U raspravi potom su učestvovali Šefik Džaferović i Momčilo Novaković.

Nakon okončane rasprave, jednoglasno je usvojen zaključak da se o zahtjevima Seade Palavrić selektivno odlučuje. Imenovana će dopisom biti upoznata o tome da Parlament nema sredstava za decembar protekle godine, ali da se iznalaze načini za prevazilaženje ovog problema.

Zahtjevima za isplatu naknade po osnovu prava na odvojeni život, posjete porodici i zakup stana već je udovoljeno retroaktivnom odlukom, ali oni nisu isplaćeni zbog tehničkih problema, što će biti ispravljeno. Potrebno je da gospođa Palavrić priloži ovjeren ugovor o zakupu stana.

Vedran Hadžović informirao je o zahtjevima dva poslanika koji žele sklopiti ugovor o zakupu s hotelom. Jednoglasan stav je svih članova ove komisije da u tom pogledu nema razlike s drugim poslanicima koji traže zakup stana u privatnom smještaju.

Ad.3.

a)Vinko Zorić informirao je da je Ljiljana Miličević podnijela zahtjev za profesionaliziranje svog radno-pravnog statusa u ovom parlamentu, počev od 01.02.2003. godine.

Komisija je jednoglasno donijela odluku da se zahtjevu imenovane udovolji.

b)Vinko Zorić potom je upoznao Komisiju o zahtjevima poslanika za ostvarivanjem prava na naknadu po osnovu odvojenog života od porodice, posjete porodici i zakupa stana.

Članovi Komisije jednoglasno su donijeli odluke kojim se odobrava zahtjev za isplatu naknada po osnovu prava na odvojeni život od porodice, naknada za posjete porodici, naknada za zakup stana, slijedećim poslanicima:

-Jozi Križanoviću- počev od 01.01.2003. godine;

-Ivi Lozančiću- po kontinuitetu;

-Elmiru Jahiću- počev od 07.02.2003. godine;

-Ademu Huskiću- počev od 03.12.2002. godine, izuzev naknade za topli obrok za mjesec decembar. I ova naknada bit će isplaćena ako se uspiju osigurati sredstva prebacivanjem s jedne budžetske stavke na drugu.

-Nikoli Špiriću- po kontinuitetu;

-Miloradu Živkoviću- počev od 01.03.2003. godine.

Ad.4.

Vedran Hadžović informirao je o zahtjevu Kluba poslanika BOSS-a, DNZ-a i Narodne stranke- radom za boljitak, za osiguranjem posebne prostorije za rad Kluba. Naglasio je da je zahtjev opravdan, ali da trenutno nema raspoloživih prostorija. Naveo je da je Vlada Grčke ratificirala sporazum kojim će osigurati sredstva za obnovu susjedne zgrade za potrebe Vijeća ministara BiH. Ova zgrada trebalo bi da bude obnovljena krajem ove , a najkasnije početkom slijedeće godine. Tako će biti oslobođen dio zgrade Parlamenta, a time otvorena mogućnost osiguranja prostorija za rad klubova poslanika kao i zaposlenih. Također će, pregrađivanjem jedne velike prostorije Parlamenta, biti omogućeno formiranje tri prostorije. Ovaj projekat donirat će Vlada Norveške.

Članovi Komisije jednoglasno su prihvatili predmetnu informaciju i zaključili da se navedenom klubu uputi dopis u kome će se obrazložiti trenutno stanje i istaći pokušaji za njegovim prevazilaženjem.

Ad.5.

a)U okviru tekućih pitanja, članovi Komisije jednoglasno su donijeli odluku da se Vinku Zoriću odobri isplata nakanade vezane za slučaj teškog oboljenja, saglasno postojećoj odluci o načinu obračuna plaća i ostalih materijalnih prava poslanika i delegata u Parlamentarnoj skupštini BiH.

Zapisnik sačinila
Dragica Hinić

Administrativna komisija
Prvi zamjenik predsjedavajućeg
Vinko Zorić